

轉

漕

日

記

轉漕日記卷二

河間 李鈞 夢韶

十七年丁酉元旦。隨中丞詣行宮叩賀。

聖節並赴文廟。及各廟行香。赴院稱賀。午初回署叩

堂上兩大人新禧。合家歡慶。京師已於去臘十三

四日得雪尺許。河南尙未。中丞委署開封府鹽捕

同知常司馬。赴輝縣百泉。

衛水發源處

取水。擇於初六日。

在關帝廟設壇祈禱。是早天微陰。暖甚。午後風

初二日移司轉請引 見咨文。

初五日常司馬自百泉回隨 中丞在 關帝廟迎水。

初六日卯刻赴 關帝廟行禮已刻得雪比至行午香

時六花飛舞匝地瓊瑤官吏同聲額慶斷續至初七日丑刻止積厚已四五寸矣喜而有作 屢詣 神

壇事禱祈續紛瑞雪正逢時恩霑大地應知溥澤沛  
新春不算遲愛惜莫將花逕掃殷勤先向麥田滋降  
康都是豐年玉嘉貺何由答 吳慈 撒鹽飛絮白

成堆漠漠同雲黯未開。玉屑亂霏千里遍。冰花直湧  
百泉來。遙知瑞色連。畿甸早聽歡聲動。草萊梁苑  
何人工賦雪。好將賓客召鄒枚。署開封府萬荔門太  
守和曰。殷勤盼澤。又春祈密灑祥霏正及時。嵩嶽雲  
連千里濶。去冬曾於嵩山取水泉源珠散六花遲。寒威應使遺  
蝗淨。生意潛教宿麥滋。呼籲萬民神感召。歡聲羣頌  
上蒼慈。飛絮成團玉作堆。同雲匝匝驟難開。豐  
占歲首三農喜。復見天心七日來。梁苑寒光搖棨戟。

闖風高唱下蓬萊。陽春一曲真難和。白戰誰銜壯士  
枚。

初七日接總運稟。知運河水泮。糧船已於初一日開行。  
初八日謝降。中丞來署盤庫。

初十日又雪。連日據各州縣稟報。通省均已得雪。大  
者盈尺。小者五六寸不等。不勝欣慰。

十三日又雪。

十四日蒙中丞發給咨文。委佐雜三十餘員分赴

各府州查鹽

十五日又雪。家君二月初一日生辰，因卽日押運北

上設筵演劇，預行稱祝。喜雪詩連日和者甚多，摘

一錄數章。學使趙蓉舫給諫同年光和曰：歲首祥靈

應禱祈春膏，豈必異冬時。天心蘊釀原非靳，人意歡

騰轉爲遲。六出繪成豐稔兆，百泉分得坎流滋。麥苗

暢茂蝻萌淨，闔澤優霑慰。聖慈。世界銀粧又玉

堆。東風一夜凍雲開，噓將春氣氤氳至。散作天花次

第來到處歌聲喧。葑屋連宵詩夢憶。蓬萊坡仙新詠。

傳鈔遍梁苑。重題愧賦枚。

甲午季冬拙作喜雪辱承賜和

藩司朱蔭

堂方伯

樹

和曰。天公有意待虔祈。恰值蘇門水至時。

一勺降靈休見少。三農慰望未嫌遲。嶽山早領和甘。

味。梁苑欣覩土脉滋。帝力神功昭感格。歡生萬

彙荷。鴻慈爲盼堦前雪作堆。靈壇預定隔年開。

天從元日連朝釀。澤自皇都次第來。繡甸有人歌

賑。霖玉樓無處不蓬萊。回思歲內關心卜。揲到金錢

第幾枚臬司楊桂山廉訪年丈

振麟

和曰豐年降玉

詎關祈端爲祥爨已後時客臘春光晴盎盎新正雪

意釀遲遲風雲和會中天普嶽瀆鍾靈大地滋一瓣

心香同請命兩河蒼赤戴宸慈遙見天花散作

堆層城一夜玉梅開春燈爛漫連宵打賀版頻番待

伴來

一百七廳州  
縣先後報雪

芳甸地應蒸沆瀣瓊樓人訝住蓬

萊萬家喜氣騰歌詠梁苑詩成勝賦枚署南陽府鄒

鍾泉太守同年

鳴鶴

和曰青壇虔接上辛祈帝鑒



臣心雪及時入地蘇融欣已遍。自天蘊釀故應遲。如期喜逐雲霓望。潤物還同雨露滋。全豫吏民翹首切一誠。默感昊蒼慈。未消前積又成堆。是處農人笑口開。百道遠分泉水足。萬花飛簇嶽雲來。祥雲先已呈京國。惠澤旋教遍草萊。苧甲吐新豐歲兆。東風拂處詠條枚。署彰德府劉芾林刺史同年和曰。穎粟關懷爲麥祈。六花如掌正乘時。歲逢酉熟膏先溥。瑞應寅恭澤未遲。飛絮漫空紛舞艷。流膏入土暗含滋。

年頭三白農心慰。率育恩濃荷。聖慈迺望彝。

山主作堆春城無處不花開。連番德澤從天降。一片歡聲動地來。東閣爭看摘翰藻。西疇莫更歎汗萊。歐

蘇高詠編成帙。佳句難憑闔數枚。候補同知黎藕華

司馬淦和曰。積誠幾度事虔祈。連名飛翼補臘時。後

素有胎彌皎皎。先花等件故遲遲。諺以雪不即消爲等件祥徵

集霰雲濃合。潤比流膏露暗滋。勝似雨金并雨玉。降

康全賴上蒼慈。萬象全包失衆堆。浩然一白望

中開歡生新歲偕春至。清極深宵儼月來。瓊朶遍裝  
南苑樹。醱膏已醒北山萊。陽春高調原難和。勉效鄉  
人大小枚。

四叠錄一

署祥符縣管樹荃明府

貽蔭

和曰自

盼祥翼曉夜祈。東風送喜恰乘時。事求稱願原非易。  
澤倍知甘轉爲遲。嵩嶽同雲 神力溥。衛源分潤物

華滋。崇朝慰滿三農望。仁愛由來感 昊慈。 珠玉

隨風散作堆。琉璃世界一時開。恍疑月自塵中度。眞  
覺春從天上來。岳牧丹誠通冥漠。神仙清夢隔蓬萊。

歐陽禁體難追步。那數梁園舊馬枚。洛陽縣鄒松友

明府

堯廷

和曰。信有真靈應禱祈。新年瑞雪未過時。

雲邊舞倦依依墮。天外飛來故故遲。春色漸融民氣  
樂土膏潛潤物華滋。謳歌早愜三農願。煦育全憑

覆幬慈。片片飛花積作堆。便教頃刻也能開。無邊

清景隨心領。不斷寒光撲面來。隴畔 恩膏滋沆漑。

眼前世界認蓬萊。麥秋預識田家樂。餅餌盈盤不計

枚。

三疊錄一

陽武縣許菊士明府

廣謨

和曰。年豐更作屢

豐祈虔禱靈壇雪應時。玉戲天公頻獻瑞。花開人日  
未嫌遲。早教破凍寒梅吐。佇看連雲宿麥滋。感召祥  
和欽大府。歡聲到處頌仁慈。連番積素已成堆。極  
目寒雲尙未開。大造無心知廣被。陽春有脚喜同來。  
九天咳唾傾珠玉。萬戶耕耘闢草萊。雅集梁園羣作  
賦。監司高詠壓賓枚。鄭州施曉巖刺史熙和曰。纔呼  
如願打灰堆。又見冰花處處開。匝地祥雲經歲到。滿  
天飛絮送春來。頓教芳信傳梅柳。共喜醴膏遍草萊。

我向程門頻立雪。賈餘勉效士行枚。錄一候補縣王滋

庵明府治泰和曰。瓊瑤霏屑萬花堆。四望空明眼界

開。恰好壇前風送到。恍如車後雨隨來。甘膏普被中

原麥。厚澤無分下地萊。預卜順成年穀稔。萌生先已

達條枚。錄一。邊景韶副車表兄筭和曰。蒼穹元默應

齋祈。飛灑祥霏幸及時。帝里霑濡恩既渥。天工醞

釀候非遲。花開昨夜千林滿。玉種豐年百穀滋。更喜

遺蝗深入地。村村歡抃戴鴻慈。幾處平鋪幾作

堆同雲一色未曾開。澤如好雨量深淺。舞趁迴風勢  
往來。銀海頓教裝世界。瓊樓真覺到蓬萊。陰陽變理  
關台輔。名覆金甌應卜枚。星槎家叔

奎垣

和曰。迎到

仙泉共禱祈。連朝瑞雪喜知時。迴風舞絮逢春早。著  
樹如花破凍遲。大地繽紛同布濩。新苗醞釀慶蕃滋。  
探梅回憶西泠路。曾踏瓊瑤訪淨慈。霏霏鎖日宿

雲堆。入望晶瑩倦眼開。匝野塵消銀海濶。半空風戰  
玉龍來。團茶小閣思陶穀。春酒高堂戲老萊。膏澤霑

濡知歲稔已看生意動條枚。下南廳高樞庵司馬。

步月

黃沁廳子邗山司馬。

卿保

密縣王仁庵明府。

定

項城縣許蕙陞明府。

樸

東河試用李明府。

應

鄭

西亭

家蘭

唐海馱

晉鏢

兩少尉幕友高君

承錫

查君

變勤

鄒君。

導源

均有和章佳什甚夥不及備錄。

十七日接總運及各運弁稟知糧船因阻風雪又河水

淺滯行走甚緩初十前僅可抵龍王廟也。

大名縣地

因定

於二十五日起程。



十九日午刻開印。自得雪後。官民同慶。僚友各設春盤。互相酬酢。幾於應接不暇。從此應酬稍減。可免酒食之困矣。蓮舫舍弟錫自家來署。

二十二日雨。自辰刻斷續。至申刻止。約有三寸積雪未消。又逢甘澍。土膏屭起。庶彙欣榮。洵豐年兆也。再登前韻誌喜。密雨如絲不待祈。無聲潤物恰知時。行春且喜甘霖早。饑歲無妨瑞雪遲。葑屋又霑新澤溥。麥田深接舊痕滋。兩河士女笙歌沸。共飲醞醕感

聖慈 積素還畱玉數堆。溟濛不放濕雲開。省耕

早看青犁出。灑道剛迎絳節來。

是日在藩署  
公請 中丞

瑞靄幾

重迷草樹。恩膏一例遍蒿萊。催詩好續梁園賦。喜  
雨亭中客召枚。

二十三日。委候補同知黎司馬會同南陽府。赴楚豫交  
界。查勘行鹽引地。並議緝私章程。題幕友張逸舟

楨 農桑圖。識君未及少年時。鶴樣清臞鬢有絲。展

卷今番欣一晤。當年張緒好風姿。半依山色半溪

光綠樹陰中看插秧。安得攜家圖裡住。與君同占水

雲鄉。

陳筠軒

堯松

賣卜圖

跣趺領會靜中緣。一

縷沉沉。裊篆煙底事。勞君頻屈指。指頭悟澈石頭禪。

身坐盤石一

手作屈指狀

盤陀一片証三生。過眼雲煙看得清。

遮莫迷津能指引。升沉懶去問君平。

二十四日辭行。中丞暨司道以下俱來送。

二十五日。以行裝尙須檢點。改於次日起程。

二十六日。辰刻起程。仍與湯薇堂。胡晴臯。邊聯璧同行。

出城後日暖風和。纖塵不起。土膏滋潤。麥隴回青。真好氣象。卽景成句。籃輿欸欸出城闌。滿眼風光及早春。殘雪依稀。彈野雀。暖風駘蕩。醉行人。幾絲綠挂楊枝。早萬隴青回。麥氣勻。遙望帆檣徐度影。吟鞭又指大河濱。二十五里抵柳園口。祭河登舟。順風下水。頃刻達彼岸。又六里新店尖。又十八里封邱縣宿。值張西林明府太夫人七十生辰。綵觴宴客。余與幕中諸君登堂稱祝。同預賓筵。

二十七日辰刻遇下北廳龔司馬

慶祥

亦來稱壽少談

而行三十五里黃德集尖值南皮張內弟

光泰

來訪

遂與偕行又十八里牛市屯宿時甫申初

二十八日辰刻行三十五里沙店尖又三十五里滑縣

宿未至數里路旁有園遙望樹木葱鬱停轡一游

園澗數十畝雜植果樹惜別無池亭之勝主人郭姓

甚樸愿畧致欸曲而別晚接總運稟知幫船於十

八日抵山東館陶縣前題強忠烈公祠詩已蒙婁

明府勒石。因屬代備牲醴。於明晨致祭。連日暖甚。夜西北風峭寒。

二十九日辰刻。詣強忠烈公祠致祭。木主神龕。粧飾一新。寓人皆已驅遣。庶昭誠敬。碑立於階下。刻工尙好。其陰則刻薇堂晴臯聯壁諸作。行二十五里。濬縣尖。早起微風而曠。愈行愈厲。飛塵撲面。寒襲重裘。浮邱山碧霞元君廟。有社會。香侶雲集。過其下。本擬一登。爲風阻興。晴臯聯壁往焉。余去歲游大伾山。未謁。

禹廟深以爲憾。遂於飯後與聯璧復登大伾。呂祖洞  
萬仙樓諸勝。以次游覽。山上風勢愈猛。層巒疊嶂。高  
不勝寒。振袂飄然。幾欲乘風飛去。下至道院少憩。復  
由觀後繞道而南。乃至禹廟殿三楹。中塑聖像。前爲  
石亭。已頽敗。階下有王文成碑。刻賦一篇。未及卒讀。  
又有碑刻七律一首。作者爲明人永嘉王叔杲。詩曰。  
初冬飛蓋拂晴雲。共陟嵯峨探秘文。河勢已非神禹  
鑿。山形迺自太行分。崖端彷彿懸金粟。洞口虛無散

紫氛登覽壯懷聊此寄。酒闌歸路已斜曛。余亦口占  
成句。以紀游蹤。絕巘臨無地。峻嶒不可攀。爲瞻神  
禹廟。又上大伾山。振策探仙境。垂旒識聖顏。河流迷  
往蹟。澗水聽潺潺。申初下山。風沙迷目。加緯夫挽  
輿而行。三十三里。過搭禮村。天已昏黑。籠燭前進。又  
十二里。井店宿。

三十日。辰刻行。風止天晴。餘寒料峭。三十五里。東莊尖。  
內黃汪明府來迓。又三十里。渡衛河。又五里。抵楚旺。



行館舊地重來。風光如昨。但浮屠桑下。不過三宿緣

耳。

定於初三日下船

漫成一律。竹馬兒童夾道譁。戟轅清

肅又停車。別無多日偏經歲。來是重游似到家。宿雨萌生新砌草。春風吹淡舊窗紗。匆匆暫把征塵掃。銀漢還乘貫月槎。薇堂和曰。身節遙臨靜不譁。部民爭迓使君車。春風送暖開三逕。甘雨含膏被萬家。把酒躬陪青案玉。敲詩日侍絳帷紗。揚舫更泛桃花水。星瀆欣隨博望槎。晴臯和曰。弓刀一隊靜無譁。候館重

迎使者車。難得再來人。望歲似經小別客。還家新詩  
疊織機中錦。舊句看籠壁上紗。星漢待探牛斗路。壯  
遊何幸附仙槎。

二月初一日。家君誕辰。謹於堂上遙祝。早起大風。  
已午間微雨。晚晴。回拜楚鎮文武各官。贈汪明

府。宦海知誰臭味同。令君高誼古人風。口碑爭頌

循良吏。眉壽欣瞻矍鑠翁。年七十餘尚健麥隴千村融地脈。

棠陰一路接天雄。內黃界連大名汪倫送我情無限。都在桃

花潭水中

初二日。續發行李下船。添雇小船一隻。分載從人。發  
省城信。暨家書。汪明府辭歸。內黃營張都閫來候。  
亦卽辭歸。以明日祭文昌也。署內黃主簿羅參  
軍。萬清以硯一方。扇一柄。贈行。扇頭詩畫。皆所自作。  
畫秀詩太纖。

初三日。飯後登舟。欸乃一聲。平流如掌。篷窗閒坐。胸次  
悠然。余自戊子歲。于役粵東。泛舟兩月。數年來輪蹄

馳逐僕僕風塵。偶然橫渡黃流。無復舟行之趣。此行  
差快意也。乘興爲詩。自泛星槎已十年。放舟又擬  
小游仙。好乘春水來天上。直送行人到日邊。錦纜徐  
牽三尺雨。竹篙輕點一溪煙。轉輪促我郵程急。莫認  
襄陽書畫船。意有未盡。再成一絕。鶯聲噫噫柳  
如絲。緩蕩煙波艣一枝。記否嚴冬風雪裏。耐寒曾唱  
打冰詞。行十八里。晚泊劉垆。清豐縣地。入直隸界。  
清豐古頓邱地。詩送子涉淇。至于頓邱是也。漢京

房邑人易學甚精長於占驗以孝廉爲郎元帝時日蝕陰晦房上疏指陳時政爲忌者所中下獄死張內弟自陸歸里

初四日卯刻行五里過第六店

去歲幫船守凍處

河面漸濶風

逆不得速進引縴而行約三四十里天已曠暮遂泊不及傍村落也入直隸界後兩岸青青麥田彌望桑梓關懷爲之一慰

初五日風仍不順且時而擱淺雖嚴催不能着力終日

推移又僅行三四十里。仍未依村而泊。閱通鑑感  
晉諸王事。羊車一去桃符死。典午癡兒作天子。蝦  
蟇聲在華林園。宮中獵獵南風起。南風起兮將若何。  
魁柄旁移倒太阿。家事紛紜竟難了。可憐同室日操  
戈。趙王倫與齊王冏。皇家太弟成都穎。楚及淮南皆  
至親。親藩又自長沙領。東海河間分稍疎。天潢一派  
聯文景。文景雄猜作法涼。遂令奇禍伏蕭牆。江山奪  
得曹瞞業。畱與兒孫作戰場。骨肉參商古未有。喋血

官庭爭碎首，鷓蚌相持苦未休。坐教利付漁人手，胡  
騎紛紛上殿來。忍看青衣喚行酒，龍顏早未識劉郎。  
荆棘銅駝歎洛陽，自爲驅除啟新主。一言慟煞豫章  
王，又詠晉肥水之捷。百萬貔貅化作塵，江東勝  
算出何人。遂教國脈終存晉，纔識天心已厭秦。偶爾  
桓沖言不效，果然王猛見如神。圍棋賭墅無聊甚，折  
屐匆匆喜是真。

初六日天未明，卽聞鳴金開船。意可趨程前進，乃行未

數里狂飈怒發浪湧有聲終日維舟未移寸步卽來  
船亦滅迹矣悶而成句 船頭浪打布帆垂盡日依  
依傍水湄怪底宦途多踳躓行舟也被逆風吹 余  
船泊南岸別船泊北岸幕中諸君終日未得一晤可  
謂盈盈一水間脈脈不得語矣 大名府陶鳧薌太  
守前輩標以東來迓

初七日卯刻行三十里泊龍王廟距大名府城十八里  
有縣丞分駐於此 大名古魏地唐曰魏博又曰天



雄宋升爲北京置畱守明爲大名府國朝因之大  
名元城附郭兩縣大順廣道駐此五鹿墟在城東  
卽晉公子重耳乞食處馬陵道在城東南卽孫臏伏  
弩射龐涓處唐魏博節度使田承嗣與澤潞節度  
使薛嵩爲婚姻常有吞併之志嵩家青衣紅線能劍  
術乘夜盜承嗣牀頭金合承嗣懼其謀遂寢宋寇準  
知天雄軍契丹使過曰相公重望何以不在中書準  
曰主上以朝廷無事北門鎖鑰非準不可韓琦畱守

北京重九宴客有詩云莫嫌老圃秋容淡且看黃花  
晚節香後人爲建晚香亭 晉東哲元城人疎廣之

後因避亂改姓官著作郎嘗補笙詩宋潘美大名人  
從太祖征伐數有功以不救楊業致有陳家谷口之  
敗劉安世元城人官臺諫遇事敢言稱殿上虎 飯

後往拜陶鳧前輩鳧與余同出孔荃溪夫子之

門昭慶原任  
貴州藩司先官清河道因案墜謫降補是職傳學

有吏治素耳其名一見如故少談往拜大順廣道陸

費玉泉

璵

觀察觀察爲易州牧時相圃舍弟

鈺

任廣

昌學博蒙其薦舉以疾未晤晤大名縣沈明府

炳章

元城縣於明府

斯年

復回郡署晚飯鳧薌前輩方輯

畿輔詩傳託余代爲採訪並以所刊詞綜補遺見贈

談次知山東濰縣教匪馬剛入署滋事首逆已獲因

叩其在 文穎館遇賊事嘉慶十八年林逆之變鳧

薌充 文穎館纂修九月十五日入直賊自 西華

門入者先撲 文穎館殺堂吏數人鳧薌在複室校

書其僕拒賊於門身被數刃方危急間聞外有呼者  
曰此非路也賊鬩然去呼吸存亡可謂再生之慶矣  
回船鳧薊前輩暨沈明府俱來拜別後投以詩曰尺  
書幾度付郵筒客路欣教雁贄通東道盤餐賢地主  
北門鎖鑰古天雄使君行部多隨雨太史吟壇徧采  
風好是晚香亭畔坐黃花老圃屬陶公

初八日卯刻行十餘里又遇大風泊趙家寨

元城縣地萬籟

調刁艤舟竟日傍晚風少息又行數里遂泊元城

縣於明府在小灘

距龍王廟四十里

相候知船不能到遣人

來饋肴蒸並告知明日丁祭而回

初九日卯刻行二十五里過小灘又四十五里泊衛家

淺

館陶縣地

入山東界

本日天氣晴明微風蕩漾舟行

甚駛朱子詩曰向來枉費推移力此日中流自在行

洵有味乎言之也

賦得此日中流自在行

得流字五言八

韻

不費推移力春江送客舟夷猶行此日自在想

中流竹箭三篙浪垂楊兩岸樓煙波隨浩蕩風雨幾

句畱高挂帆初穩。輕搖艫亦柔。曠觀憑縱目。利涉記  
從頭。是處堪容與。伊人任溯游。乘槎欣得路。仙境訪  
瀛洲。觀岸上拉繹者。又成一律。微風披拂霽煙  
霾。滑笏春流淨若揩。舵手屢教魚尾掉。繹夫遙見雁  
行排。河渠迤邐如長巷。船室清幽勝小齋。閒倚篷窗  
無箇事。幾回撥悶檢詩牌。

初十日卯刻行。十餘里。又遇大風。泊兩時許。又十餘里。

過南館陶。村名蓋館陶廢治也。又二十里。泊李家圈。館仍

陶地

晨起攬鏡。

鏡裡顏如舊。惟嫌兩鬢蒼。飢驅廿

餘載。失却少年郎。壯志應難副。童心尙未忘。蛾眉時  
一畫。老婦拜姑嫜。過南館陶。接見薌前輩和章。

河干纔別遞吟筒。衣帶盈盈鯉信通。錦纜牙檣新轉  
運。玉堂金馬舊詞雄。清才合賦梁園雪。妙筆曾傳粵

海風。

觀察著有  
使粵日記

早晚姓名書。

御辰自

天題處奏

膚公。

欲傾家釀醉郵筒。師友淵源一脈通。秋雁名

篇推李嶠。元亭奇字問揚雄。

余與觀察同出孔  
荃溪夫子門下

苔岑

夙契來今雨。燕趙重煩補國風。河嶽英靈遺集在。藥  
籠準擬乞梁公。再疊前韻。却寄。報章欣又接書  
筒。佳什重將款曲通。梁苑賦才今寂寞。鄴臺詩骨劇  
沉雄。大名亦多君下筆濃垂露。笑我停橈慣阻風。此  
去遺珠搜故里。定期集古助歐公。月下與聯壁登  
岸閒步。夜大風。船身震撼。寒氣撲人。

十一日。卯刻行。二十餘里。過館陶縣。館陶。古陶邱地。  
禹貢導沈水東出於陶邱北是也。漢曰館陶。今爲東



昌府屬縣。水次距城約三四里。隱隱可望。又二十餘

里。遇風少泊。繼以微雨。又數里。泊傅家頭。仍館地過

館陶。得四絕句。綠繞春城水一篙。煙中遙望戍樓

高。芊綿草色如相送。柔櫓聲中過館陶。綠繞孤村

水一篙。樹陰斜颭酒帘高。杏花消息風吹透。燕子聲

中過館陶。綠繞平疇水一篙。荷鋤人去夕陽高。麥

田兩岸青無際。布穀聲中過館陶。綠繞長堤水一

篙。幾株濃覆柳陰高。柔條不繫扁舟住。細雨聲中過

館陶

十二日卯刻行十里過尖莊

臨清州地

又六十里泊菜園距

臨清不及十里也

接總運稟知幫船於本月初四日

過臨清

蒼茫野色又黃昏盪入煙波月一痕沽酒

難尋紅杏墅泊舟多傍綠楊村琴書自得窗間趣雞

犬遙聞岸上喧指點清泉前面是明晨準擬叩關門

十三日辰刻行五里過南水關署臨清州候補同知貴

格以東來關以纜爲之兩岸之間橫牽爲界迤東曰

大關則限以牯。卽南糧幫船所由之會通河也。設牯七十二。蓄水濟運。故俗曰牯河。至此合流於衛。又五里。泊臨清西關外。日尙未午。木擬飯後再行。緣家丁船戶。上岸買什物。人不能齊。遂止。臨清古爲清淵。又爲清泉。元魏始曰臨清。本縣治。今升爲直隸州。南北衝要。運道所經。設關權稅。巡撫委知州監收。山東糧船尙有在河下候兌者。知前幫未開行也。明謝榛州人。布衣工詩。列前七子中。乾隆三十九年。

逆匪王倫作亂連破壽張堂邑陽穀等縣遂圍臨清

舒將軍

赫德

率禁旅討平之

臨清雜詠

折柳爲

樊不可攀一繩橫互水中間於今虎豹真無勢估客

謳吟曉度關

盈盈帶水湛清波歲運

皇糧百萬

多南自江淮北漳衛千秋利澤會通河何李才名

孰比倫布衣當代有詩人東邦壇坫多風雅今日誰

爲謝茂秦曾作圍城遞紙鷓天戈一掃靖烽煙兒

童此日頭都白小劫滄桑六十年發家書暨山東

經秋山撫軍

額布

候啟

晚間月色朦朧與聯璧由

馬市街赴關上一游臨水有名靈閣

蓋取有仙則名有龍則靈之意

未入歷頭二兩插坐岸上觀漁人搬罾

十四日辰刻行未數里濃陰四合細雨廉纖萬點輕瀝

波紋如繡不但眼前好景滌盡塵氛甘澤一犁更足

爲農人慶也雨意連綿大有終日之勢遂泊賦得

春帆細雨來

得春字五言八韻

坐對溟濛雨輕舟泛水濱

平添三尺浪穩送一帆春蘊釀催花信霏微斂麴塵

濃垂沿岸柳。涼撲倚窗人。風颺千絲軟。煙拖十幅勻。  
有痕天際影。無恙客中身。往跡思南海。前途近北  
宸。恩波流浩蕩。計日涉龍津。申刻變而爲雪。  
登岸一眺。見有佛刹。曰淨寧寺。古柏森然。少事游覽。  
冒雪而歸。

十五日。天微明。聞爆竹聲。詢之爲舟人祀神。乃復就枕。  
辰刻興。天已放晴。行十餘里。爲風所阻。過午始行。又  
三十餘里。泊安泰寺。仍臨清地詠明瓦窗。以蛤蜊爲之泛

舟有客游春江。木蘭之柁。木蘭艫。吟眸欲縱秋水雙。  
碧紗不羨玲瓏窗。草間吠蛤。其形厖。此中別有光明  
幢。良工磨洗。借奔瀧。琉璃片片聲琤琮。縱橫櫺格排  
如杠。眼前春色。窺蘭汀。水晶失色雲母降。綺疏窈窕  
明金釭。更禁夜雨。聲聲撞。鄴臺聲價不可扛。欲評真  
質。徒紛唵。何如此瓦來南邦。鏡中常看波淙淙。泊船  
且繫垂楊樁。吹火烹鮮酌玉缸。聽我水調歌新腔。  
安泰寺巨刹也。與聯璧晴臯登岸。欲往一游。叩扉不

應歸坐岸上。月色皎然。聽晴臯吹笛。

十六日辰刻行。天氣晴爽。微風不波。六十里泊武城縣西關。縣爲東武城。古清河郡地。今隸東昌府。言子所宰之邑。乃南武城。卽今嘉祥縣也。隸濟寧州。又

是漫漫一日程。名區指點最關情。先賢別有絃歌地。空使游蹤到武城。漢崔炎。邑人。長鬚偉貌。魏武帝將見匈奴使。自以形陋。使炎代已。而自捉刀立牀頭。旣遣人問曰。曹公何如。使者曰。雅望非常。然牀頭捉



刀人乃英雄也。元魏崔浩亦邑人，白皙如女子，自比張良，而謂稽古過之。撰國書三十卷，請勒石以彰直筆，爲忌者誣搆，坐誅。其他崔氏人物尙多，故清河爲崔氏之望。接總運稟知幫船於十二日抵德州，山東糧船尙未開行。城垣以土爲之，頗形荒陋。月下與聯璧入城一覽，街市尙繁庶，臨河故也。

十七日卯刻行，風靜波平，一路所見山東幫船絡繹不絕，六十餘里泊竹竿廂。

仍武城地

接家書知幼女以痘

殤 署開封萬荔門太守丁內艱遺缺以鄒鍾泉太  
守同年接署 月色甚佳與聯璧入村閒步 傍岸  
須登眺身勞不耐閒連宵欣有月一路惜無山村小  
纔成聚河長慣坐灣迴看泊舟處燈火渺茫間

十八日辰刻行五里過鄭家口

故城縣地

少泊市廛殷庶巨

鎮也又十餘里風暴作終日不息遂泊 入夜風更

劇

十九日卯刻風少定行十餘里萬竅怒號浪花如雪又

不能進矣。抵暮，又行數里，泊蘇家樓。

仍故城地

過鄭家

口後，河流曲折，大率皆對頭灣。蘇家樓村中，舊有一樓，舟行三次見之，故有三望蘇家樓之諺。今圯。迴

風吹送片帆斜，蟻磨盤旋路幾叉。孤負行人三度望，畫樓何處是蘇家。

二十日卯刻行，未數里，風又大作，停泊終日。既夕，又行

數里，泊賈家林。

仍故城地

風姨肆虐，簸浪揚沙，船身加數

纜引之，猶覺震動。較日間更有餘威也，悶甚。故城

縣許小塘明府

瀚

以東來並差人支更

阻風效張

平子四愁詩

前日之風風浪麤狂姨拍手相揶揄

舟子繫船白日卧行不得也啼鷓鴣美人贈我雲錦

帆長繩十丈懸桅尖我所思兮在鄉縣

故城

欲挂帆兮

風已變

昨日之風風颼颼浪花如雪堆船頭挽過

三里又五里綠楊望斷蘇家樓美人贈我青竹篙岸

草點破羅裙腰我所思兮在德水

德州

欲持篙兮風又

起今日之風風怒號長河滾滾翻銀濤行人爲唱

公無渡。寸心被縶如猿狖。美人贈我木蘭漿。渡口桃花映三兩。我所思兮在析津。欲蕩槳兮風未馴。明日之風風何如。已聞畫角吹烏烏。安得泠然轉蘋末。魚鱗春水明一渠。美人贈我長錦纜。條條牽惹垂楊線。我所思兮在潞河。欲解纜兮風正和。五更風止。二十一日辰刻行三十里。抵故城縣東關。許明府來拜。並送酒筵。詢之爲乙酉江西拔貢。與二三舍弟同年也。清謹而有幹才。入城荅拜。故城古清河郡地。漢

爲甘陵。金曰故城。今爲河間屬縣。樓堞參差帶夕

陽。萬家煙樹鬱蒼蒼。一帆未出山東境。城郭俄驚到

故鄉。梓里文章舊有名。後先幾輩列蓬瀛。晦翁外

轉朱紹庭侍御濂溪死。周六泉太守年少今猶見買

生。成烈肅寧人又二十餘里。泊四女寺。地屬山東

恩縣。距城五十里。恩縣於此兌漕。恩縣古爲貝邱

宋曰恩州。今爲東昌屬縣。四女不知何代人。舊說

謂其父母年老。以無子偶發慨歎。四女相顧謂曰。安

見女子不能事親耶。遂易男子衣冠。孝養父母。終身不嫁。寺原在北岸。中塑其父母像。四女巾服左右侍。薇堂曾親見之。後圯於水。移建南岸。飯後與聯璧晴。臯入寺展視。祠三楹。狹隘已甚。無其父母像。四女巾服如舊。各執如意。桃燭等物。仍事親意也。舊碑沒於河北。山東糧道張詩於觀察。祥河新立詩碣。序稱四女。宋氏實姊姊五人。若莘若昭若倫若憲若荀。皆善屬文。若昭著女論語十篇。唐德宗朝。悉入禁中。典秘

籍拜若莘尙宮。

女官名

若昭若憲嗣其職。若昭贈梁國

夫人。若憲於文宗朝譴死。蓋據唐書尙宮宋若昭傳也。夫身入宮禁。若昭並受夫人封號。安云不嫁。旣拜女職。自有采章。何以又皆巾服。且明言四女。似與若昭姊妹五人者。未盡脗合。証以薇堂所見。並所執之物。余終以舊說爲然。賦四絕句。綺羅換着老萊衣。巾幘鬚眉世所稀。多少紅顏辭白髮。桃夭時節賦于歸。奇節天教聚一家。都將返哺慰慈鴉。田荆孟荀



無顏色。報得春暉姊妹花。代父從軍有木蘭。歸來  
依舊訂紅鸞。空閨歲月高堂膳。更比沙場遠戍難。

落日空祠傍水潯。客來瞻拜幾沉吟。生男未必如生  
女。移却人間父母心。附錄詩船詩。不櫛皆成國

士風。故應祠廟此邦崇。十篇閨閣知論語。一傳才名  
附尙宮。衛水清冷涼月白。貝邱蕭瑟野花紅。年年轉  
漕帆檣利。極目靈旗澍雨中。

二十二日。辰刻行。十餘里。抵晝兒樹。德州地徐前後幫船。

在此停泊。運官來謁。詢知幫內平靜。畫兒樹。廬南

石相國夫子

蔭溥

祖塋也。有馬尾松兩株。輪囷如蓋。

土人謂可入畫。故地以樹名。少泊往觀。其地河水環抱。樹木鬱蔥。洵爲吉壤。巍然一塚。無碑可讀。或卽雅雨先生佳城歟。飯後又行。一路河南幫船。魚貫停泊。直抵關外浮橋。總運及各運官陸續來見。知山東船僅開三幫。尙須少候。方能前進。山東船共十幫。臨清關內五幫。關外五幫。關外者。德正濟左濟右臨東

前臨東後等幫也。總運在前押行。閘內者。濟前濟後。東昌濮州東平等幫也。糧道在後押行。閘內幫船。又因受兌各州縣。有在閘外者。分出五小幫。仍濟前旂後等名

附前五幫內。河南船向候前五幫開竣。銜尾而進。後五幫則在河南船後也。行三十里。抵德州西關。泊浮橋口。德州古平原郡地。鬲津河在其境內。故曰平

津。元魏爲安德。隋曰德州。今隸山東濟南府。糧道駐此。國朝田雯。號山薑。官至戶部侍郎。盧見曾。號雅

兩官至兩淮鹽運使。俱州人以風雅名世。爲後學所宗。申刻。往拜糧道張詩於觀察。觀察庚辰進士。由部曹簡放。博雅工詩。書畫亦所擅長。尊甫與家君同年。故春明舊雨也。自余出守後。別來將十年矣。歡然道故。以轉漕詩集見贈。復拜駐防營佛旗尉。貴城守營安參戎。明署德州沈明府。湘明府已赴余舟。相左。平前幫廖運官。以詩稿請政。筆氣雄秀。雋才也。並呈二律。奉檄來曹鄴。登龍謁李膺。科名金殿

早品望玉壺澄。五馬梁園寄。干檣使節承。和平與公  
怒。嘖嘖弁丁稱。題就裁冰句。談詩色笑溫。粗官遇  
優禮。畧分竟忘尊。惠政元絃鵲。豪情太白樽。三江開  
府去。舊話許重論。余和曰。自訂蘭舟誼。詩名久服  
膺。英詞黃絹妙。藻思綠波澄。鄴下羣才掩。雲間一派  
承。平生甘說士。疊疊向人稱。又誦清風句。重將舊  
雨溫。耽吟逢賈島。壯志勗王尊。流水琴三疊。扁舟酒  
一樽。知君詩律細。剪燭好同論。接家書知舍姪文顯

入泮。

二十三日詩舫觀察暨佛旗尉安參戎以次來拜。東昌府下河廳譚司馬爲紹在州查河亦來拜。總運永

司馬移尊早酌。飯後偕赴各幫。抽查繩石均極乾燥。

詩舫邀午飯。並往校射。署東偏有園。高柳數株。方

塘半畝。土山拱向。曲逕交通。頗饒野趣。箭亭題曰序

雁軒。詩舫有賦曰。繁鬲城之一角。拓園徑於十弓。序

嘉賓以弧矢闕。小廈於蒿蓬。分行雁外。列坐軒中。孰

具擘窠之手。請書官解之東。古木陰繁。周遭曲垣。籬  
花雨漬。池草風翻。觸鄉心於遠塔。趨靜境于塵樊。際  
散衙而吏退。亦何礙乎窺園。其地有亭有臺。宜秋宜  
暑。舊井蛙鳴。新巢燕語。夜聞支更之鶯。晝見搬葢之  
鼠。琴書而蹟寄。蝸廬兄弟而情聯。雁序一席清談。頻  
年拙宦。四方之事必先。三耦之儀。習慣泐懸的于心  
旌。固束身于腰襪。何來林外之鷗。正度岡頭之雁。靜  
中思動。寂裏聞喧。可以調榮衛。可以息勞煩。使我強

飯與君笑言。倏斜照兮在地。又明月兮當軒。射失已  
以反求。園日涉以成趣。半畝風煙。幾行鷓鴣。旨酒設  
兮犀罈。羅羣從來兮豹侯樹。相與逍遙乎軒中。不必  
登高而始賦。同射者安參戎譚司馬。主人得雋。上  
燈入席。觥籌交錯。賓主歡洽。並訂次日音樽。子初歸。  
二十四日。山東總運泰安府通判官鄧亭別駕。隆德州  
衛趙守戎。焜俱來拜別。駕卽於是日登舟。已刻踐  
詩於之約。同席者安參戎譚永兩司馬。聯璧晴臯。暨



車行一語 卷二 三  
詩舫幕客數人。子正歸。山東船尙未開竣。余擬次日先行。前途相候。

二十五日巳刻。沈明府來送。正欲解纜。又遇石尤風矣。不果行。以詩謝詩舫。並畱別。賦別京華十度春。化疆今喜過平津。敢偕大雅稱同調。難得長途遇故人。射圃鳴弦朝序耦。歌筵顧曲夜聯茵。東風也爲君畱客。三日停橈衛水濱。詩舫和曰。舊譜堂前芘大春。太邱交誼話津津。使車昔作同行侶。戊子科余與夢韶同日奉命典試

閩  
粵仙舫今爲共濟人。酒畔花光眞似錦。河干草色漸  
如茵。開頭挾舵君先去。後會流杯路水濱。岸上有  
董子讀書臺。德州衛卽其地。爲醇儒書院。有聯云。化  
雨常新。闕里遺風臨德水。春風廣被。江都教澤潤長  
河。尙妥。按董子廣川人。卽今景州也。景德相連。蓋均  
廣川境耳。寂寞鬲城隈。斜陽董子臺。如何安德境。  
引重廣川才。教澤濃霑雨。鄰封近聽雷。同爲桑梓地。  
尸祝亦宜哉。安參戎知余未行。傍晚復到舟一叙。

二十六日行五里以風劇不能進泊北倉山東兌漕地也。

二十七日山東前五幫開訖河南幫船銜尾而進行

未數里風又大作遂泊終日不能解纜也詩以遣悶

數載任繁劇承乏大梁守公事夢如絲拮据及手口嗟哉太史公眞同牛馬走竭來事轉輸三旬乘鷁首燕居春晝長清閒得未有同舟兩三人落落素心友詩或歌一篇酒或飲一斗借此安樂窩暫作逋逃

數詎余耐苦辛。清福難消受。枯坐百不聊。嗒焉若喪  
偶。冥心馳域外。悶懷不可剖。况觸風姨怒。終日獅子  
吼。停舟寂寞濱。自卯常至酉。面壁類枯禪。閉置如新  
婦。回憶府中趨。較勝今吾否。乃知鈍根人。俗情易紛  
糾。動靜必相循。勞逸均難久。心實貽之戚。境豈任其  
咎。性爾牢縛。蠶情絲難殺。藕一枕常遙遠。我愛漆園

叟

謂聯璧

夜間風止

二十八日丑刻行六十里抵桑園

仍德州地

少泊與薇堂諸

君登岸遊覽入大士尼庵有吳橋范文正公

景文所

書碑字極古拙時天啟七年公官太常飯後又二

十五里過安陵又十五里泊通州幫越而前矣安

陵屬景州入直隸界河間協副將向於此催漕景

州漢廣川地隋曰椿縣唐曰景州今隸河間府漢

董仲舒州人少治春秋下帷發憤三年目不窺園武

帝時舉賢良對天人三策拜江都相稱漢醇儒嘗夢

蛟龍入懷作春秋繁露元魏高允州人太武時爲景

獻太子傅與崔浩同修國史浩被收景獻欲脫其罪  
教以對上語及入見允直陳無隱帝嘉其直赦之高  
齊封隆之亦州人參神武帷幄之謀歷事五朝始終  
完名世稱長者明戈瑄亦州人憲宗時官御史歷著  
風裁仕至刑部尙書子姓蕃昌至今爲景州望族  
就枕後聞幫船夜行不能成寐 帆楫順流下聯翩  
度雁行通宵人語鬧一片水聲忙子夜歌難就丁沽  
路尙長朦朧揩倦眼把卷趁燈光

二十九日寅刻行十餘里風起水湧不能推移遲至午  
後又行十餘里風復作遂泊距連鎮約七八里客  
路艱辛已慣嘗風姨何事太披猖千艘簸蕩魚難貫  
萬仞憑陵虎正狂野色迷濛吹草綠日光黯淡帶沙  
黃石尤遮莫頻相阻已送行人到故鄉天津德左  
兩幫一夜過盡